

2 Tesalonicenses

Pablo ‘ka amõñiguh’ chib pørig

1 ¹Na Pabloba, Silasba, Timoteoba kanbalatø misra, Tesalónicasrø iglesian i kilgawan pørar, namui Tius Møskaimba, Señor Jesucristoba kanbalatø pønrrabelan, ²Tius Møskaweinukkurrimba, Señor Jesucristoinukkurrimba tru ka yandø tab indiiba, chi isumgaig tab købiiba ñimba pasrønrrun.

Cristo katø arruben Tiusbe maig kønrrabigwan asha martrun

³Chu uraskucha ñimuimburab Tiuswan ‘ungwa’ chib kømig køtan, namui nunelø, nam treeg marambuawei maramig søl kuimba. Kaguende ñimui isubigwan Jesucristoinug pasriibe maramburab katøguchinguen nurab iben, katø ñim møitøgucha kanikkurri kanikkurri undag købig tøgagúikkucha nurab yain køn. ⁴Inchawei treekkurri nambe Tiuswei iglesiamerayu ñimuimburab truba tab kui waminchibelø ker, ñim melabig melaigwanba, isubigwan Jesucristoinug pasra melaigwanba, chine kaig indinab melamig arrubigu, ñim truba isuig puraambub melamig nebuindøgucha. ⁵Pøs kerrigu iibe tru maig kønrrabigwan Tius nø asha mariibe, sølgandø maig maramigwan marøbig kui ashchai kenamaran, Tius nø ashib karub waisrø ñim kebamrrabgailø købigwan kebambamig kønrrai marøb. Treekkurri ñimbe truigweimburab mõi ya yeeg kaig indinab melan.

⁶Tiusbe sølgandø tab asha marøbiibe ñimun kaig nebunrrai marøbelane, nømungucha treetøwei møra melønrrai martrun. ⁷Incha ñim chine kaig nebui melabelan lata, katø namun lata isramig kønrrai tranrrun. Øyeeg puppe, Señor Jesús nui ángelesmera maramburab marøbeløba, srømbalarøngurri naabaig arrua, kenamisrøb kwaløm treeg punrrun. ⁸Tiuswan ashmeelanba, katø namui Señor Jesucristoi tabig srø wamwan mørøg kømui inchibelanba Tiusbe maig kønrrabigwan møra melønrrai martrab attrun. ⁹Truilane tru managatig pinisainug møra pønrrønrrai pønsrailø kønrrun. Incha Señorwei merrabgurrimba, tru nui maramburab marigwei tørguegwalmabigugurrimba webusriilø kønrrun, ¹⁰tru nui misaamera nun maya nuguen tab indig kønrrappa, tru mayeelø nun kørebelø yeekkucha kønrrabmab kwaara asig

kønrrappa arrub kwaløm. Inchen ñimgucha tru utu tøgá pønrrønrun, kaguende nam maig eshkaib wamindigwan ñim kòreikkurri.

¹¹ Øyeeg punrraiwei nambe chu uraskucha ñimuyasig Tiuswan ‘purugurra’ cha miabelø ker, ñim treeg kønrrabgailø kuigwan Señor wamigwane nõ wamiilø kui treeg mara tøgagønrrai. Incha nui maramburab mariitøgá ñim chigøben tabig martrab isua tøgagúilanba, katø isubigwan Jesucristoinug pasra chigøben marøb kuigwanba newan treeg marig kòrrømisrtrai, ¹² namui Señor Jesúswei munchiwan øyamaybe ñimgurri maya nuguen tab indig køben, ñimbe nõgurri maya nuguen tab indiilø kønrrai miabelø ker, tru ka yandø tab indig namui Tiusweimba, Señor Jesucristoimba maig kønrrain køben treeg.

Señor katø arrumigwan tab eshkaib

2 ¹ Pøs trube, Señor Jesucristo katø arrumigweimburappa, katø nam nõba tulundzunamigweimburappa, ñim namui nunelan, ² tiusmanda ñim maig isua pønrraigwan ke mõi mõi peetø isub yunømarøb, ke chinsraatø inchib pønrrønrrai kwaarøsrainab pønrrønrrab kømø chinrrab inder. ‘Tru arrum kwalømbe yandø pun’ chib, ‘Tius treeg wamindingarutan’ chib wamindi lata, kabe ‘treeg køn’ chib eshkaig lata, kabe ‘treeg kønrrun’ chib ‘nam kilga pørig køn’ chib waminchib kui lata mormønrrigay. ³ Ñimbe mumaygucha kegørrøsrkainab pønrrønrrab kømø, melay. Kaguende tru Señor arrum kwaløm pumøwatø, misaamera Tiusweimburabelan elacha, yandø wendøbasrøb, katø tru newan larrø kaig, tru managatig pinisaig kønrrabigu pasrønrrai pasrig kenamismøwatøbe treeg pumønrrun. ⁴ Tru møøbe tru chimerandøgucha ‘tius køn’ chib tøgagúilanba, katø chiwan køben kòriibala tabig waminchib tøgagúilanba, ashig kømui inchib sètø pasramisrøb, purab nuig misrøb pasrønrrun. Incha treetø kønrrab kuindø, Tiuswei yauguen kebya wamisra, nõashibguen ‘Tius kur’ chib wanrrun.

⁵ ¿Na ñimba uñib uraswei na ñimun iigwan wamindigwan isumuitarru? ⁶ Tru kaig martrab møg treeg maramig puben tru uras kenamisrtrai tru merrarrab sètø pasrabiibe chi sètø pasrain kui ñimbe ashibelø køn. ⁷ Kaguende tru mu asiimíig purø kaig pasrabiibe chabguen marøbguen pasran. Inchendø tru treeg marmønrrai mõi ya merrarrab sètø pasrabiibe, sètø katab pasrabig pasrønrrun tru utugurri wesramnegatig. ⁸ Inchen yandø tru newan larrø kaibe kenamisrtrun. Inchen truigwan Señor Jesúsbe nui trigugurri urriitøgatø kweecha, tru nõ tøguegwalmabig arriitøgá pinishinrrun. ⁹ Tru larrø kaig arrua mariibe, Satanás purugúitøgá marøb attrun, marøppe, Satanás maramburab mariiløtøgaba, nõ pasrain kui ashchai mariilan mariitøgaba, tabig kòmíitøgá kwaara asha kønrrai marøb pasrailøtøgaba. ¹⁰ Incha tru kaigyu pønrramsrømay amrrabelan kegørrøsrkamig nõbe chigurrimbunø sølwan kømø, kaløwan marøb kaig martrai pønrrønrrun, kaguende tru kaigyugurri wesrailø kønrrab tru newan ciertonigwan undaaramø, kaashibeløgurri.

¹¹Inchawei Tiusbe tru pelørskøb kegørrørskøbigwan maramburab martrai ørtrun, isa wamindiilan køenrrai, ¹²katø tru newan ciertonigwan køremøtø, sølgandø tabigwan mariimeeløyu truba tab kui inchib marøb pønrrabelane mayeelanba kaigyu pønrrønrrai pønramig kønrrai.

Kaigyugurri wesrailø kønrrai lawa wesrailø

¹³Inchendø nambe chu uraskucha Tiuswan ñimuimburab ‘ungwa, ungwa’ chib kømig køtan, Señor undaaraig nunelø. Kaguende srøsrøgurri kaigyugurri wesrailø kømig kønrrai Tiusbe ñimune lawa wesraig købig køn, Espiritu Santogurri tabig chishmarikkurrimba, katø ñimui isubigwan newan ciertonigu pasra tøgagúikkurrimba. ¹⁴Tru øyeege kønrrai isuawei, Tiusbe ñimun wamig køn, tru tabig srø wamwan nam eshkab wamindiitøga, tru namui Señor Jesucristoi tørguegwalmabigwan ñimgucha nebua tøgagønrrai.

¹⁵Treeg købene, namui nunelø, maig pønrrabeløbe truyutø tarømisrmø melay, namashib pønrrøwa kusrenaniilan lata, kabe kilgayu pørigwan kusrenaniilan lata truigwane elatchab kømø, tab tøga pønrray. ¹⁶Namui Señor Jesucristo nøtøwei, namui Tius Møskaimba tru nø namun undaarawa, tru nui ka yandø tab inditøga managatig chi isumig kaanrraimba, munig melamig truba tabigwan tranøbiibe, ¹⁷ñimui manrrømerayu purø tab kui pønrrønrraimab isub, ñimui chigurrimbunø tabig marigu lata, tabig wamindigu lata tabig marig kørrømisrtrai treeg martrun.

‘Tiuswan namuyasig tøga miab kørrunrrigay’ cha Pablo miaig

3 ¹Pøs treeg købene, yandø møimbe, namui nunelø, namuyasig Tiuswan miab melørrunrrigay chinrrab, Señorwei wam petø truørø larrøbichib inrrai, trurrigu tru wambe maya nuguen tabig kui mørøb utig kønrrai, tru ñimui utusrø puben, utab lataitøweingue. ²Katø trømbøig marøptø yandø mindiilø, larrø kaig møguelai tasku nam kegørrab melamig kømønrrai tøga miarrunrrigay. Kaguende isubigwan Jesucristoinug pasra tøgagømigwane mayeeløbabe tøgagømøn. ³Inchendø Señorbe chu uraskucha tarømisrmøig kua, nøbe ñimun kørrømø, mur pønrrønrrai purugub, Satanás, tru larrø kaigwei tasku kegørrømønrrai ashib tøga pasrønrrun. ⁴Nambe Señorøtgabe treeg kuitamab isua pønrrer, martrai nam karua pønraigwan ñim mõi ya marøb melaigwan lata, katø maramigwan ñimbe marøbig martrab kui. ⁵Tiuswei undag købigwanba, maig kuingucha yaandø, yaandø melamig Cristo tøgagúigwanba, Señorbe ñimui manrrømeran trunun nebua tøgagønrrai martraimab isur.

Maramigwane martrai waminchib

⁶Namui nunelø, maramigwan treeg marøb melønrrigay chib, Señor Jesucristoi munchiyu, marmø kømø, treeg martrai ñimun karumønrrun, tru Cristogurri ñimui nunelø møikkøben ke chigucha chi marmø, ka uñchabgøba inchib, nam

ñimun maig kusrenanig køben treegwan mōra marmfibabe linchimōtay cha. 7 Pōs ñimbe yandø ashibelø køn, nam mandø waraig købigwan ñimgucha treetōwei waramig kønrrai. Nambe ñimui utu warappe, chi marmø ka warønrrabgøba inchimōwei, 8 kabe namma mōigweiwan køben mappe, chi marmø ka purrōwatō mamōwei indig køn. Masken treeg kōmōtō, namma maramigwane isua mōra, muraara muraara yem kwalōm marøbelø ker, ñimun mōilan køben kagatō ka tranrraindø munig purrōmōnrrappe. 9 Nambe mu mandamgaig maramig chigar kuagurri ñimun ‘purugurra’ chinrrab kaima pōnrrōmōtō, ñimguen namun asha kusrenrrai isua, øyeeg muraara marig købig køn. 10 Nambe ñimba amōñib urassrōweinguen øyeeg kønrrain cha iigwan karua pasrig købig køn: mōikkøben maramigwan chi marøg kōmui inchibiibe, trube, mabgucha mamumig køn cha. 11 Nambe wammōra ker, mōiløgøben ñimui utuelø ke chigucha chi marmø ka amōñinrrabgøba inchibelø kuin kui, nōmuimburab kōmubendø, mendailaisrø ke ka neesha mōrøb. 12 Treeg inchib misaamerane nambe Señor Jesucristoi munchiyu marmø kōmø, martrai karua pasrer, maig maramigwan treeg marøb melōnrrain cha, nambe nōmun waminder: warappe, nōmuiwan marøb wasrōndaa marøb kuy cha; mappe, nōmuiwan manrrab.

13 Inchen ñim, namui nuneløbe, chigøben tabig maramigwane muraarab melōnrrab kōmø, maray. 14 Mōikkøben tru i kilgayu maig martrain cha trendaigwan mōrmfigwane ñimbe trunune trendø treeg kui yandø asha tøgaguy. Incha truibabe linchibgucha linchimumig køn, treenchene kwartrai. 15 Inchendø kaig kōnmab ashiptø ashig kōmui inchib treeg inchib tøgagōmōtō, nuneg kui ashabe, ‘ashiptø megau cha; øyeebe marmumig køn’ chib, eshkab wamindamig køn.

Tabig wamindiilø srabeig

16 Señor tru chi isumgaig tab købigwan tranøbig, nōtōwei manatøgucha maig kuindøgucha ñimun tru chi isumgaig tab købigwan tranrrun. Señorbe ñim mayeeløba pasrōnrrun.

17 Na Pablo nai taska iigwan pōrar, ñimun ‘ka amōñigueh’ chib. Kilgamera mōitøgucha na pōriiløbe na pōrig kōnmab asamdeelø kønrrai, øyamay pōrøbig kur. 18 Namui Señor Jesucristoi ka yandø tab indiibe ñim mayeeløba kønrraimab isur.